

GUITS NE PQUIAA

SANTIAGW

1 ¡Diuzh to grëse to!

Naa nac Santiagw, tib zha ne quiayun xtsiin Dios, tib zha ne quiayun xtsiin Jesús, men ndzon ne rnabey. Laa naa rquiaabdiuzh to grëse to ne nac to zha ne ziaad lo xtii Israel, tel pa lotaa nac guidzliu ne no to.

²Bets, bzian, ndal ncuaañe rded ne parne glu dien pe nli dib zdoo ne rnalo ne Dios. Tel pe nactaa ncuaañe noded to i, ib gacmbande to, sinque golley.

³Sac gon, zeene squi ran ne grë pe guielñë, ga rseed ne tibliladz rac ne tel petaa noded ne. ⁴Golseed sca tibliladz golgac. ¡Ib guiaañd zdoo to tel petaa nac guielñë ne gan to! Sac zeene sca cseed to gan to guielñë, zac to tib zha ne dziits so lo Xtii Dios, tib zha ndzinli, tib zha ne ib peet gdziebd.

⁵Zha ne racladz yгаа guielbiini co, zac gnab zhow lo Dios, ni mesi gon zdeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me. ⁶⁻⁸Lëëraasi dib zdoo ne none gnab new, nodne gacchop guic ne; sac zha ne racchop guic, gdzind dze yгаа zho mine rnab zho. Nac zho, tib dze dib zdoo zho rliladz zho zгаа zho mine rnab zho, stibгаа dze na rliladzdraa zhow, ib ractiblid guic zho; masaque nac zho zig nac grë mtsiin ne rbib lo nisdoo, sac tel mtsiin co loxaque nëzrii nëzrec zienie mew.

⁹No zha bets ne, zha bzian ne, quianied zho ncuaañe yquiin zho, par miech peet nond zho; per none gon ine gley zho sac nroob non zho lo Dios. ¹⁰⁻¹¹Scagaa zha ne rapchen, none ine gley zho niina ne biaanwin zho, sac nëz lo Dios grë ncuaañe rap zho nonda. None guien zho niicle ne nroob rapchen zho, zeene laa zho gbi lo guidzliu rii nuque guiaañ grë ncuaañe rap zho. Masaque nacse zho zig nac guieen grë guizh ye, tel guiee cow, zhixtsëëse ngbidz rcuiidz guizh ne zoba lo, rlozh ga rliaalgaw, gataa rnitlo xquielniowa.

¹²Dichos zha ne ib rzozite lo Dios niicle no nzian ncuaañe rcheep zho guntal zho xtol zho, per rund zhow; sac zha cosi zгаа zho tib guielmban ne gdzind dze lozh, guielmban ne bneele Dios gdeed me lo grëse zha ne rleynie me.

¹³Zeene sca no ncuaañe rcheep ne guntal ne xtol ne, guiabd ne togo Dios noquuil ne gun new; sac gon led yed Dios rzoobladz ncuaañe ndzinlid, ni niicle

rquiildгаа me miech гуn zhow. ¹⁴⁻¹⁵Grë ncuaañe ndzinlid ne rzoobladz ne, grë ncuaañ yozh ne rionie guic ne, min co nac mine rquiil ne. Lëew nac mine rcheep ne runctal ne xtol ne, ni ndionle ne ganle, lëe gdib mine gdeed dol lo miech nac guielñe dox ne yгаа zho.

¹⁶Bets, bzian, gac-wete to sca. ¹⁷Golguien ganle, ncuaañe rquiin, ncuaañe ndzinli, min co nac mine rneedz Dios. Tibaque nac me, led yed me rdzëe par guiab ne meque rnabey rac guielntseeb. Me nac tib biini ne gdzind dze guiuu, ni tib lë guielcow guieñd zaatne no me. ¹⁸Zdoo me gola bneedz me tib guielmban ndzon lo ne niina ne laa bliladz Xtiidz me, masaque rrieequia ne nac mëedglo lo me.

Nacda yquiaadiagse miech Xtiidz Dios

¹⁹Bets, bzian, ne nac to zha ne rleynie naa: Golgacnan ganle, ne ne nac ne zha ne no xnëz Dios, none dzioxcoraa ne yquiaadiag ne, zeene gnee ne none guien ne pa lotaa gnee ne, ni gund ne ne rnadse pew laa ne glëele. ²⁰Sac gon, zeene riëe ne, grielod gun ne ncuaañe rdziladz Dios. ²¹Golguien sca, golsaan grëtaa ncuaañe ndzinlid ne ziyun to, golbiche lo grë guielntseeb ne znutaa quiyac niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëew rlu zha laa to lo dol.

²²Per guiabde to togo loxaque yquiaadiagse to Xtiidz Dios lëew ga; sinque ib none gban to mine rquiaadiag to, sac tel ib gbande tow lëew to noquidie to ga. ²³Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan: ²⁴Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne. ²⁵Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuaañe gun zho.

²⁶Gacxe waa, zha ne rnee xnëz Dios no zho ni rgobeyd zho pe rnee zho, lëew zha noquidie zho ga, ga rlu nlid zienal zho mine rnabey Dios.

²⁷Sac gon, par Dios men ne nac Pxoz ne, zha ne no xnëz me none tsie zho tsiegun zho xyudar grë mëedbziab, tsiegun zho xyudar grë wnaa ne ret tsieel, ni tsoxco zho zaacse gban zho, ib tsienald zho ncuaañe ndzinlid ne run grëraa miech.

Lëda ga run zha ne rbe

2 Bets, bzian, gunde to ne ncuëese lo miech ne gnee to, sac zha ne sca run, zha dien guiab zho xnëz Jesús no zho. ²⁻³Ron naa, zeene rlanso tib zha ricw zaatne rcaalsa to i, nacw zho xab niazh zho, no grë xnil or zho nia zho, lëelëd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: “Ise bzo, telne racladzгаа luu sob luu, lo liuse i bzob.” ⁴¿Pe sca na rac zha ne no xnëz Jesús? Zha ne gon sca run, ga rlu zho niapse guielntseeb no guic zho.

⁵Lēda ga gon̄ bets, lēda ga gon̄ bzian. Golgacnan̄ ganle, ible Dios ble miech ne peet rapd lo guidzliu rii, zeena dib zdoo zho gnalo zho me, zeena ygaa zho zaatne bneelee me gdeed me cuēz zha ne noxco rleynie me. Gotsaa gwi ne sca ganle, zha ricw nac zho nēz lo Dios; ⁶laa to gon̄, no to rlozhd gzhidznie to zho. ¿Pe ib riende to, grē zha ricw co nac zha ne rsacsi to? Rgobniu zho to, riezō zho to lo wxtis; ⁷haxta rdzibdee zho Jesús, men̄ ndzon ne nacie to niina.

⁸Ib none gban ne zigne rnabey Xley Dios, lo xley me zhubnee: “Bleynie samiech luu, zigne rleynie luu luu.” ⁹Golguien̄ gon̄, dol̄ i noyun̄ to squi rbe to dien̄ cho nac zha ricw, chogaa nac zha mban; sac Xley Dios i quiaquiits to. ¹⁰Golgacnan̄ ganle, zha ne rguiits tibaque xley Dios, niicle maase zienal̄ zho grēraaw, laa zho beenctal-le xtol̄ zho ga, rzacaque zho zig zha ne noguiits grēw. ¹¹Sac tibaque men̄ ne psana grēsew. Gacxe waa, tel̄ zha ne zienal̄ mine rnee: “Gute luu samiech luu”, per rguiits zho mine rnee: “Yquiangobd luu zha ne led tsieeld luu”, laa zho beenctal-le xtol̄ zho ga.

¹²Niowse sca gōlgac, niicle zeene gneegaa tow, niowse gōlnee; sac gon̄, zdzin̄ dze cxobdol̄ ne dien̄ pe wban ne zigne rnabey Jesús, te wband new ye. ¹³Grē zha ne ni lalnu rquiad zdoo samiech, gal̄ dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guielnē dox ne cxeel̄ me.

Zha ne rnalo Dios none glu zhow

¹⁴Bets, bzian, ¿pa dien̄ rquiin guiab ne dib zdoo ne rnalo ne Dios, xnēz me no ne, ni tel̄ rund̄ ne xyudar samiech ne? ¿Niacxe scase laa Dios csilaale ne? ¹⁵Gzoob ne no zha ne nacgrē to i, yase tib bets tow, tib bziangaa tow, ranlo to guien̄d xab zho, niicle quianied zho ncuaane gow zho; ¹⁶ni guiab to lo zho: “Csacsid luu luu, got xabnal̄ luu, dow ncuaane racladz luu”, per loxaque diidz sca guiab to, ni gdeete to ncuaane run̄ falt lo zho. ¿Pa dien̄ yquiin diidz co?

¹⁷Scadaa nagon̄ paat rquiinda guiab ne rnalo ne Dios, ni tel̄ rund̄ ne mine rieguial̄ ne gun̄ ne. ¹⁸Gacxe waa, zha ne rnalo Dios ni run̄ zho mine rieguial̄ zho, no zho gnē lēda i run̄ zha ne rnee lēlew ga totsaque gnalo ne Dios. Ni rap zho rson, sac grielod glu ne rnalo ne me, tel̄ne rund̄ ne mine rieguial̄ ne.

¹⁹Nli wena run̄ zha ne rliladz tibaque Dios no, per grielod guiab zho lēlew ga, sac gon̄ zig nac mendox ye ma rliladz tibaque Dios no, per led por mincod laa ma lo guielnē ne cxeel̄ me, sinque haxta rdzieb ma me. ²⁰Nadzpaa nxen zha ne sca rzac, pe ni lalnu riend̄ zho paat rquiinda guiab zho rliladz zho Dios ni tel̄ne rund̄ zho mine rieguial̄ zho.

²¹Golgan̄ ganle, zig nac pxozgol ne Abraham, porne been̄ me mine rieguial̄ me gane pcaania Dios me zig tib zha ne peet xtol̄. Led rsoladz to ganle, zeene rēb Dios lo me tsielogon me xpēed me, güey me zaatne pxeel̄ Dios me. ²²Gotsaa gwi ne ganle, zeene been̄ Abraham mine bnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios. ²³Lo Xtiiidz Dios zhubnee ne scataa dib zdoo Abraham bnalo me Dios, gane pcaania Dios me zig tib zha ne peet xtol̄; zēēb diidz, tib zha ndzieeldiidz Dios goc me.

²⁴Gołgacnaṅ sca gaṅle, led loxaque gliladzse miech Dios, laa me ycaaniale zho; sinque none glu zho nli rlıladz zho me, guṅ zho miṅe rṅabey me zho. ²⁵Gołsoladz gaṅle, scaque wnaa ro nēz ne brielē Rahab, por beṅ me xyudar samiech me, gane pcaania Dios me zig tib zha ne peet xtold; sac zeene goṅ me noxtseeb zha ne pxeel Josué zie wleets ga, bdeed me zaatne biolan zho, ni blu me stib nēz ne wbire zho, bgaad zho. ²⁶Gase na gaṅle rlu, paat rquiinda guiab ne rlıladz ne Dios ni tel rṅnd ne miṅe rieguiald ne, nacse ne dzigo zig tib xcuerp ngutoo, tel cuerp cow, ¿pa dien yquiina?

Ncuaaṅe ruṅ ludz miech

3 Bets, bzian, guiabde to lega tso to glisqui to ncuaaṅe ruṅ stib miech, sac tsod zha ne demaste wen lo guidzliu rii. Zha ne sca ruṅ, rzac zho zha so cseed zho miech, per gacnaṅ zho gaṅle zha ne rseed miech, mazdraa nroob ncuaaṅe tsasqui lo zho gał dze ne laa zho gacredz lo Dios.

²Grēse ne nzian mod ne rxin ne lo samiech ne. Tel niaca miṅe no tib zha ne grieelo ycuēz ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow. ³Gotsaa gwi ne gaṅle zig nac guay, con tib lē win guiib ne rgo miech ro ma rrieelo rṅabey zho ma, rienie zho ma nēz ne racladztaa zho. ⁴Scaque barcw, niicle ne nrooba, no hor rriee me dox lo nis rcheepa, per con tib lē yag lag win ne rsē miecha, rrieelo rienie zhow nēz ne racladztaa zho. ⁵Scapaa nagon nac ludz ne; niicle ne winsew, per nroob guielqui ne ruṅa. ¡Ran to gaṅle tib bzhił yeense name rzobgui dan! ⁶Ni tel ludz ne goṅ, rrieequia tib bel ga naca. Tib lē win xcuerp ne naca, per guielqui nroob ne ruṅa, ruṅctala xtol miech. Guṅ ne cuent tib lē gui ne briece gabil naca; ni dipse lo xquielmban miech noxtseeb zho low.

⁷Gołwi gaṅle, rrieelo miech ruṅndoo zho grē ma ne rsiibe, grē ma ne rzēlen liu, haxta grē ma ntseeb, haxta grē ma ne no nisdoos, rṅabey zho ma. ⁸Per guiend zha ne goṅ grieelo gnabey ludz; ncuaaṅe ntseeb naca, choot grielod gnabeya; masaque laaw no par gnitlow miech, zigne ruṅ grē guizh ncuaan. ⁹Lēew name rquin ne roolnie ne Dios meṅ ne nac Pxoos ne, ni rlozh ga lēequew rdzibdee ne samiech ne, ni lalnu rienṅ ne me bzaa zho, biaan zho zigne rlu me. ¹⁰¿Pe ga nadien, ro ne roolnie ne Dios, ni roque ne rgodee ne samiech ne?

¹¹Bets, bzian, led scada goṅ. Zig nacse tib zhlian, ¿niacxe zaatne rłanaque nis nex gaque rlan nis yuzed? ¹²Tib yag nexgaaw, ¿niacxe rquia xnex yag oliv lo yag guigw, yquiaagaa guigw lo lbē uv? Nanle to gaṅle racd miṅ co.

Zha ne nixbiini

¹³Lo grē zha ne nacgrē to i, tel no zha ne rzac zha nixbiini nac zho, none glu zhow inē zaacse gbannie zho samiech zho, gac zho tib miech ndooladz zig none gac tib zha nixbiini. ¹⁴Per tel tibaque nē rac zdoos zho raṅ zho zha ne stib noded, tibaque noguib zho csanwin zho samiech zho; gacnaṅ zho gaṅle, led scad rac zha nixbiini. Ni lalnu rieguiald tso zho csanziuu zho zho.

¹⁵Led scad nac guielbiini ne rdeed Dios, sinque lëë zhiwseed mendox ga, lëë min co zienal grëraa miech guidzliu. ¹⁶Zeene sca në rac zdoo miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grë guieintseeb rzobni zho ga. ¹⁷Zha ne nli rap guielbiini ne rdeed Dios, rund zho min co, laa zho zienal:

ndzinlise gban zho,
rleynied zho dil,
rguib zho zaacse rnee zho lo miech,
wen rac zho lo grëse miech,
rquia zdoo zho samiech zho,
rund zho cue zho zha ne mazdraa gacnie zho,
ncuaane run zho dib zdoo zho run zhow,
niapse ncuane ndzinli rioxco zho.

¹⁸Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdzin dze ne ran zho zeene laa grë miech co rac tib miech wen.

Zha ne rleynie guieintseeb

4 Ne squi tibaque rlëëlsa to, tibaque quiadil to, lëë min qui gon riegäl por grë guieintseeb ne rio guic to. ²Rio to riogui to ncuane grielod yquianie to, rlozh ga, haxta rut to samiech to parne yquianie tow. Në rac zdoo to ran to cho zha quianie ncuane quianiede to, zeene ran to rrielod yquianie tow laa to rlëënie zho, haxta rdilnie to zho. Rrielod yquianie to ncuane racladz to, sacne rnabde tow lo Dios. ³Niicle tel rnabгаа tow lo me, rneedzd mew, sacne laa guic to zienie yquianie tow loxaque par gdeedguxt zdoo to, gdeedguxt xcuerp to.

⁴Que tal ntseeb to! ¿Pe ib riende to, Dios gon rlëënie to zeene squi rio to rleynie to grë guieintseeb? Sac miech ne squitaa rleynie guieintseeb, lo Dios ga ractseeb zho. ⁵Golgan ganle, zha rnee lo Xtiidz Dios: “Espíritu Sant, men ne pxeel Dios nacie ne, rleynie me ne, ni racladz me zhaa ncuane gleynie ne laa ne gleynie ne me.”

⁶Ni tel Dios gon, noxco me ne, ib zacnie me ne griee ne lo guieintseeb; sca rnee lo Xtiidz me, zaatne rnee: “Zacnie Dios grë zha ndooladz, sangue grë zha niats, rdziguiend me zho.”

⁷Golguien sca, ine ndooladz golgac, golgon mine rnabey Dios. Gdeetraa to diidz yquii mendox to, sca golgun zeena zhal ma gbiche ma lo to. ⁸Dib zdoo to golsëeb xnëz Dios, zeena scagaa me zacnie me to. Goltsoxco guiaanmbe to lo grëtaa xtol to, golinab lo me csanmbe me zdoo to, mese gnalo to, gachopdraa guic to. ⁹Golguien ganle, ndzinlid i squi mban to! ¡Mban golgac, goltso guieinë, golgoon, laa ne tso to gzhidz to, laa ne tso to gley to! ¹⁰¡Ndooladz golgac lo Dios, zeena cue me to lo grë ncuane nac to, csanglaa me to!

¹¹Bets, bzian, ib gneenëde to zha ne nacgrë to. Zha ne rneenë bets zho, bzian zho, bel zho, ni rdziibdol zho zho, Xley Dios ga rguiits zho. Laa ne so zho gacladz zho zha gun guielwxtis, mazd tsoxco zho gban zho zigne rnabey

ley. ¹²Golguien ganle, Dios psan ley, ni mese riegual gun guielwxtis, me nan cho cuibdol, chogaa csilaa me; per to nadien, ¿cho nac to par gdziibdol to samiech to?

¹³Togaa ne nac to zha ne rnee: “Na gzhe widz dien pa tib guiedz ne guioo ne, guiobiaaz ne ga tib iz, ga dziuun ne wzi dziuun ne wto, dziuunlo ne dimi”, golquiaadiag mine gne naa lo to ganle. ¹⁴Ne sca rnee to, ¡pe wen wen nan to dien yo to gzhe widz co! ¿Pe rande to lega nacse xquielmban ne zigne nac xcow las ne rbe ral sil? Zhisaque rbew, zeene rlozh ga rludraa dien yow. ¹⁵Mazd golguiab: “Telne zneedz Dios diidz gbanraa ne, min rii, min rii dziuun ne.” ¹⁶Led tsoade tibaque guielniats qui zienie guic to, golguien guielntseeb ga run zha ne rac niats. ¹⁷Ni golsoladza ganle: Grëse zha ne nanpaa pe nac ncuane ndzinli ne no gun zho ni rund zhow, xtol zho ga runctal zho.

Zha ricw ne ziana guielntseeb

5 ¡Grë zha ne rapchen, zha ne ziana loxaque guielntseeb, golquiaadiaga ganle! Golgoon, golquiaadan redz niina, sac gon nroob nac guielne ne gan to. ²Grë ncuane beenlo to i, peet nonda, lega naca zig nac grë ncuane biodzle; grë xab to i, rrieequia ncuane dowle mxila. ³Grë guuib or, grë guuib plat ne squitaa quanie to, rrieequia noloozhle bioochena; ni scadaa gon nitlo to, masaque gac to zig tib ncuane riab lo gui.

Laa to beenlo grëtaa dimi qui, rzac to lëew yquiin to len dze ne ziaad, ni nande to gon laa dze ne nitlo to ziaadyoble. ⁴Lëë grë dimi qui gon zëëb to lo grë zha ne quia xtsiin to, noquidie to zho rguizhde to xtse zho. Per golgacnana ganle, grëse redz ne rquiaa zho zeene mban rac zho squi rsacsi to zho, laa Dios binlew. ⁵Lo grëtaa iz ne mban to lo guidzliu rii, loxaque grë ncuane gdeed guxt zdoo to, grë ncuane gdeed guxt xcuerp to noxco to, ncuane yozh ne riaabtaa guic to laa to runa, ib riende to laa dze ne nitlo to ziaadgaxle. ¡Lëë to noyun xcuent ma ne noro par guet ma! ⁶Pe zhistaa guielntseeb ne quiayun to, haxta zha ne peet xtold, zha ne nand glis nia lo miech, rquiaqui to zho ncuane rund zho, rnabey to ret zho.

Nodne guieed zha ne rnal Dios

⁷Bets, bzian, sangue to gon tiblque golgac haxta gan to gdzin dze ne laa Jesús guiaad stib, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblque rac zho gdipse len mëë guie, rquiambëz zho haxta rdzin dze ne rlaap zho. ⁸Tiblque sca golgac. ¡Ib guiaand zdoo to, sac gon zhile gdzin dze ne laa men ndzon ne rnabey ne guiaad stib!

⁹Ib tsoade to guieednie to grë zha ne nacgrë to, zeena gunctalde to xtol to; sac zhile gdzin dze ne laa men ne no gun guielwxtis guiaad. ¹⁰Golsoladz ganle, grë zha ne biadteed xtiidz Dios padzeela, niicle nroob guielne gon zho, per tiblque goc zho. ¹¹Zig nac Job, nanaxe to ganle zha nactaa guielne ne gon Job, per ib bieete me, ni blozhse gon me guielne co nroobraa guielnzaac ne bdeed

Dios lo me. Ga rlu ganle, zha ne sca rdeed me diidz ran guieḽnë, led lega ranḽ zhow; sac nquialadz me miech, rquia zdoo me zho. Dichos grë zha ne sca nac.

¹²Bets, bzian, zeene tsiegala glu to diidzli rnee to, tsode to gzeet to gbaa, gzeetgaa to guidzliu par gliladz miech xtiidz to; guiab to: “Lëpaa gbaa qui”, “lëpaa guidzliu rii”, dien peragaa gzeet to. Tib diidz ne nliw, golguiab: “Nliw”, tib diidz ne nliḽgaaw, golguiab: “Nlida”, zeena guḽctalde to xtoḽ to; sac gon zha ne runctal xtoḽ, ible zгаа zho guieḽnë ne csiaab Dios.

¹³Lo grë to, zha ne no pe tib lo guieḽnëw, gnab zho lo Dios gacnieḽ me zho. Zha ne no pe tib guieḽbleya, goolnie zho me. ¹⁴Zha ne rzacnëgaaw, gnabey zho gacredz bla zha ne zo lo to, zha co quëëb nceit guic zho gnab zho lo Dios guiac zho. ¹⁵Teḽne dib zdoo zha co gnab zhow lo Dios, zunguiac Dios zha rzacnë co. Zlische me zho lo xquieḽguidz zho, ni teḽ por pe falt ne beengaa zho lo me sca rzacnë zho, zun me zhow perdon.

¹⁶Gacxe waa, tib tib to zeene run to pe tib falt, yqueetsde tow, golzodiidza lo zha ne nacgrë to, lozhse ga goḽnab lo Dios gun me to perdon, zeena guiaanmbe to lo me. Sac tib zha ne biaanwenle nëz lo Dios, zeene sca pe rnab zho lo me run mew, niicle ncuaane mazdraa ngana.

¹⁷Goḽsoladz Lí ganle, men ne biadteed xtiidz Dios lo miech padzeela, samiechaque new, per dib zdoo me bnalo me Dios. Tib dze bnab me lo Dios csiaabd Dios nisguie, ni scase goca, dipse leḽ tson iz groḽ ni tib lab nis guie biabd; ¹⁸haxta bnabraa me lo Dios guiaba stib, dzigoraa biaba, laa guidzliu biire bdeed guieḽnzaac.

¹⁹Bets, bzian, teḽ cho tib zha ne nacgrë to i sozit lo Xtiidz Dios, ni grieelo cho tib to ctsire zho nëz yozh ne zie zho ga; ²⁰golgacnan ganle, ladzniale guieḽgut ga rsilaa zho zho, grëse xtoḽ zha co zun Dios zhow perdon. *Santiago*